

《延壽命經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 85, No. 2888

No. 2888

佛說延壽命經

爾時世尊。在娑羅雙樹間。臨般涅槃。有四眾。比丘比丘尼優婆塞優婆夷等。皆來集會□□□□□延壽。跏趺合掌。前白佛言。世尊我等四眾皆來集會。奉請如來。莫入涅槃。唯願如來哀受我等勸請。令住一劫。莫入涅槃

爾時世尊告延壽菩薩。汝等諦聽。吾當為汝分別□□□□□已來經今四十九年。教化眾生。上至飛鳥。下至蟻子。蠢動含識有形無形。四足兩足多足無足。胎卵濕化。如是眾生盡令遇善知識而登正覺。與我□□□。今欲入涅槃。本為波旬所請。波旬□我言。瞿曇三界眾生盡受生死。瞿曇今日若住一劫。違我本願。爾時我受波旬所請。而入涅槃。我違波旬。豈是諸佛。延壽菩薩白佛言。世尊波旬外□生壽□諸佛涅槃。擬為三界之主。一切眾生盡入魔網。無有休息。從生死至生死。從煩惱至煩惱。常與魔為眷屬。不遇正法。又死入地獄。千劫萬劫常無光明。刀輪□銅蛇鐵狗。牛頭獄卒手如鋒刀利如霜雪。終朝竟日共相撮挽。恐怖無極。無處藏隱。不聞父母三寶名字。一日之中千生萬死。從地獄出復受種種諸惡□生身。或作駱駝身。或生驢中身。常負重常因饑渴。若生人中貧窮下賤。為人所使。衣不蓋形。食不充口。或有富貴而無男女。或有貧窮而多子息。或有眾生惡□在床痿黃困篤篤。連年累月形消肉盡。惡瘡膿血遍體常流。人所惡賤。或受盲聾瘖瘂。或百歲不死受苦。或三十富貴早亡。如是橫羅其殃。並入魔網。唯願如來令住一劫。莫受波旬所請

佛告延壽菩薩。善男子。我滅度後若有眾生。受如是種種惡報。但造延壽經一百卷乃至一卷。兩卷譬如一人有力不如十人之力。十人之力不如百人。若造延壽經亦復如是。但造此經散轉與人受持讀誦。我當救護。譬如慈母生一子。子若得病慈母亦病。子若得愈慈母亦愈。若善男子。一切眾生皆是吾子。善願之者吾當舒金色。譬以摩其頂隨其本願無不獲果。爾時延壽菩薩以偈讚曰

世尊具相真金色	八十種好悉莊嚴
四十九年大慈父	波旬無故請涅槃
寂滅如空不可見	定知三界永無生
佛法滅定起災殃	魔王毒心競相向
一切聲聞及菩薩	一切人民四部眾
法河涸竭法幢摧	法山崩倒法缸沒
八國諸王皆自撲	血汗流淚如暴雨

何期大師入涅槃 我等凡夫更久住
聲聞緣覺稱善哉 一切眾生失依附

爾時眾中有大菩薩。名曰普淨。問延壽菩薩。如來今日入涅槃。將何付囑惡趣眾生。令命長壽。莫似如來三界第一。而不住一劫

爾時延壽白言。普淨菩薩。佛滅度後令寫延壽經一百卷。散與眾生。而共轉讀。短命眾生令得長壽。如來大慈舒金色臂為摩頂受記。如來當自覆護。爾時普淨讚言。善哉善哉。承如是言。必非虛偽。信受奉行

佛說延壽命經一卷